

九江府志卷之七

職官志

名宦

名宦即職官摘其功業之著者表而出之以示勸爾蓋功業者名之基本其巨細如影之隨形不可誣也要之有一仁一惠之施者民皆不能忘焉觀其建祠立碑築墓雖異世猶一日也然則爲人上者務苛刻之政俾民疾首蹙額無所于告果何心哉

九江府志卷之七

一

漢灌嬰高帝時爲將軍提兵南略至九江築城捍患有

功於民今祀爲城隍神

王嘉字公仲平凌人鴻嘉中守九江約已愛民卓有

治聲

宋均字叔庠建武中爲九江守時郡多虎害舊募設檻穽虎害尤多均曰虎爲民害咎在殘吏於是退奸貪進忠善一去檻穽既而虎皆北渡楚沛多蝗

飛至九江界者輒散去明帝朝拜爲尚書令民德
之爲立清風閣迄今祀焉

滕撫順帝朝博求將帥三公舉撫有文武才拜九江
都尉東南悉平

服虔字子慎滎陽人舉孝廉嘗作春秋左氏傳解著
賦碑誄書記連珠九憤等篇靈帝朝爲九江太守
文章政事卓越一時云

邊讓字文禮英才俊逸以直言正色不阿出守九江

九江府志卷之七

二

久任成績累膺褒賜

晉華軼字彥夏平原人永嘉中歷振威將軍江州刺史
雖逢散亂每崇典禮置儒林祭酒以軍咨祭酒杜
夷爲之俄被越檄使助討諸賊軼遣前江夏太守
陶侃爲揚威將軍率兵三千屯夏口以爲聲援其
在州威惠並行得江表歡心士赴之如歸

應詹元帝時爲江州刺史時王敦新平人心未協詹
懷撫之多得其歡心

陶侃字士行鄱陽人大興初領江州刺史勤於吏職
筆翰如流在郡值春夏旱齋戒沐浴露頂跣足禱
于南壇既而得雨官民交慶嘗董工役以完豐濟
之廩積軍餉以給海運之舟尋都督八州諸軍事
蘇峻叛温嶠庾亮等推侃爲盟主舉兵匡輔王室
斬峻于石頭國難遂平梅陶曰陶公機神明鑒似
魏武忠順勤勞似孔明陸抗諸人不及也在軍四
十二載贈太司馬謚曰桓

九江府志卷之七

三

温嶠字太真咸和元年都督江州軍事有惠政嘗陳
言豫章十郡之要宜選單車刺史撫豫章專理黎
庶詔不許又定謀誅王敦在鎮見敦畫象命削去
之時蘇峻祖約反嶠聞建康不守號慟以兵赴難
至潯陽庾亮疇太后命以嶠爲驃騎將軍開府儀
同三司嶠曰未有功而先受賞何以示天下卒不
受時峻兵已犯闕嶠乃用從弟充計與征西大將
軍庾亮陶侃共入討峻於石頭斬之朝議留嶠輔

政嶠固辭以京邑荒殘留資蓄具國用而後還鎮
至牛渚磯因拔齒中風未旬而卒時年四十二江
州士庶立祠祀之顏曰忠烈

劉胤字承胤東萊掖縣人咸和初爲平南軍司加散
騎常侍蘇峻作亂胤與溫嶠等守湓口事平以勲
賜爵豐城子俄而代嶠爲平南將軍都督江州諸
軍事領江州刺史

庾亮字元規咸和間都督江州諸軍事蒞政以寬使

九江府志卷之七

四

民以義田野闢訟謀簡軍民胥安遠近悅服後討
郭默平蘇峻加征西大將軍尋爲司空嘗作樓于
湓江之涯人號庾樓盖不忘其遺愛也久圯嘉靖
丁亥兵備副使何棐改構於公署之左名曰復庾
樓

王羲之字逸少咸和間庾亮薦其清貴有鑒裁遷江
州刺史羲之幼訥及長辯瞻以骨鯁稱於時善書
名冠古今仕至右軍將軍

庾翼司空亮弟咸康六年都督江荆等州軍事時人
易其年少或弗克繼其兄翼悉心爲治戒政嚴明
數年之間公私充實衆迺服其才時晉遷江表中
原淪於左衽朝臣習於宴安無有以讎虜爲念者
獨翼志在克復以滅胡取蜀爲已任繕修軍器大
備積穀以圖後事爲晉室名臣

王允之敦從子自總角時敦愛其聰警每以自隨嘗
夜飲允之辭醉先卧敦與錢鳳謀爲逆允之悉聞

九江府志卷之七

五

其言即於卧處大吐衣面並汚鳳出敦視之見允
卧於吐中不復疑之會其父舒拜廷尉允之求歸
省盡以其言白舒舒與王導陰啓帝預爲之備後
帝誅敦王含父子走荊州王舒遣軍迎之沉其父
子於江咸康中以中郎將江州刺史蒞政甚有威
惠

褚裒字季野康帝爲琅邪王時納裒女爲妃即位徵
拜侍中遷尚書省堅求外補除建威將軍江州刺

史在官清約不苟取予雖居方伯恒使家僮樵採
孟嘉字萬年江夏鄂人也曾祖宗有孝行祖父揖爲
廬陵太守徙家武昌新陽縣萬年賦性冲默有遠
量閨門孝友人無間言咸和中太尉庾亮鎮武昌
并領江州辟爲部廬陵從事又辟爲勸學從事每
稱其有盛德大傳褚裒與亮會燕求識其面其見
重於人如此永和中和爲江州別駕後爲大將軍桓
温叅軍温甚重之奉使京師除尚書刪定郎不拜

九江府志卷之七

六

孝宗穆皇帝聞其名賜見東堂轉從事郎中遷長
史在朝正順門無雜賔好酣飲逾多不亂年五十
一終於家陶淵明謂其自總髮至於知命行不苟
合言不矜夸未嘗有喜愠之容又贊其清蹈衡門
則令聞孔昭振纓公朝則德音允集蘇子瞻亦以
爲晉士多浮而無實其有不然者惟孟嘉一人云
桓冲大司馬温弟爲江州刺史寧康元年温卒以世
子熙才弱使冲領其衆遂以冲都督楊豫江州事

冲既代盡心王室或勸其誅除時望不聽始温在鎮死罪皆專決冲謂生殺之重當歸朝廷須報而後行未幾以謝安素有重望以揚州讓之自求外出桓氏族黨苦諫冲處之澹然乃改為徐州刺史太元二年復都督江荆等州以秦人强盛欲移阻江南奏自江陵徙鎮上流以劉波守江陵楊亮守江夏六年破秦兵於竟陵拔管城獲其將闔振吳仲尋代襄陽焚踐沔北屯田掠六百餘户而還八

九江府志卷之七

七

年帥師伐秦拔筑陽九年伐秦拔魏興上庸新城逾月而卒以桓伊領江州

桓伊字叔夏譙國人以破符堅功封永修縣侯遷都督江州等十四郡軍事江州刺史至之日以邊境無虞宜以寬恤為務迺上疏言江州虛耗連年不登今餘户有五萬六千宜并合小縣除諸郡逋米移州遷鎮豫章詔令移州潯陽其餘皆聽之伊隨宜撫綏百姓賴之卒葬豫章至今有墓存焉

何無忌義熙中為江州刺史進鎮南將軍賊將盧循遣別師順流而下無忌率衆拒之俄敗績衆奔散無忌猶躬執其節以督戰竟握節而死後人傷之立廟祀焉

陶潛字淵明義熙間為彭澤令居官八十餘日以不屈督郵解印綬遂隱於柴桑在位雖不久高風遺烈邑人咸仰之至今廟祀不替

南北朝檀道濟元嘉中拜征南大將軍江州刺史後遣

九江府志卷之七

八

還鎮有鳥似鷓集船上悲鳴後道濟被殺時人思之歌曰可憐白符鳩枉殺檀江州其惠澤所及人不能忘如此

陳顯達宋永明中為征南大將軍刺江州有惠政行已謙讓自以門寒位重每遷官常有愧色戒其子勿以富貴凌人而諸子多事奢侈顯達曰麈尾拂蠅是王謝家物不須提此取而焚之故能保終其

令名

蕭秀任江州刺史將發從者求堅船以爲齎舫秀曰
吾豈愛財而不愛士乃教以上舫給參佐下者載
齎物至州聞前刺史取陶潛曾孫爲里司歎曰陶
潛之德豈可不及後胤耶即日辟爲西曹

王茂江州刺史先江州刺史陳伯之反豫章太守鄭
伯倫起兵拒守詔以茂爲江州刺史帥師討之時
伯之攻豫章不能下茂至與伯倫表裏交攻伯之
敗走從間道奔魏江州迺安

九江府志卷之七

九

唐鄭善果貞觀初爲江州刺史政教敷洽愛民興學號
爲清吏歿于官

狄仁傑天授中爲來俊臣所誣貶彭澤令適歲旱奏
免民租又縱罪囚令如期而還邑人感之爲立生
祠

白居易字樂天元和中貶江州司馬喜曰匡廬在念
久矣今得青山綠水爲風月主人不亦可乎迺築
草堂于香爐峰北以自適在州多惠政遺愛於民

磊落不羈之懷憂國思鄉之念多形於吟詠因潯陽江頭夜送客遇商人之婦作琵琶行文以見違世之意文見亭類或曰樂天時無妓禁行亦託言也江文蔚字君章登唐長興二年進士後南唐爲御史對仗彈馮延巳常夢錫大言曰白麻雖佳要不如江文蔚一疏坐貶江州奉其母以行怡然不以貶謫爲意嘗作詩曰屈原若遇高尚在終不懷沙吊

汨羅

九江府志卷之七

又九

呂巖字洞賔京兆人咸通進士拜潯陽令能以德化民遊廬山遇異人得長生訣後遊湘潭渚鄂之間天下悉知其名

胡則唐江州指揮使時州郡皆已降宋江州刺史謝彥實亦集衆謀納欵則謂下曰吾世受李氏恩安忍負之刺史不忠乃與同列宋德明等攻彥實殺之爲唐固守曹翰圍之城陷數其拒命之罪對曰犬吠非其主公何怪也翰殺之遂屠江州

錢徽字蔚章憲宗元和時為江州刺史州有盜劫貢
船捕吏取濱江惡少年二百人繫訊徽按其枉悉
縱去數日得真盜有牛田錢百萬刺史以給宴飲
贈餉者徽命代貧民租

李渤字濬之長慶初為江州刺史孤操自持急民之
患嘗作詩勸農云萬顆皆因一粒春良農何待勸
諄諄四時若要農安業須革妨耕酷虐人又築南
湖隄立斗門洩水勢以利民涉人號為甘棠湖

九江府志卷之七

十

劉秉仁乾符間為江州刺史賊帥李彥章掠江西秉
仁乘驛之官單舟入賊水寨賊出迎降秉仁斬之
而散遣其衆百姓安堵

塗曉以中散大夫為江州刺史廉能可述當時士評
號為金聲玉色

五代皇甫暉南唐江州節度使周師伐淮南暉率江州
屯兵以拒之軍陳整肅士樂用命雖中原名將往
往憚之

吳舉字大冲永興人南唐李煜時為彭澤簿宋興煜
不奉詔命曹彬討之兵破池陽遣使降郡縣使至
彭澤令長欲以城降舉以大義責之且曰吾能為
李氏死乃殺使者固守弗渝及煜降舉為遊兵執
送軍中主將責以殺使者罪舉曰固當如是爾乃
義而釋之

廖凝字熙績有學行隱南嶽開平間任彭澤令詩云
風清竹閣留僧宿雨濕庭莎放吏衙及解印又云
五斗徒勞自折腰三年兩鬢為誰焦今朝官滿重
歸去還挈來時舊酒瓢其清正如此

九江府志卷之七

十一

宋鍾離瑾字公瑜合肥人開寶間令德化守義愛民有
女將歸許氏求媵胥與老嫗引一女至給曰此臨
川人幼孤育於外氏遂市焉一日瑾視事歸遇於
屏流涕有戚容詰之曰吾父曾令是邑不幸與母
俱亡方五歲胥育為已女今十年矣適見明府視
事追感吾父不覺泪下瑾大驚遽審胥嫗果如女

言遂易其衣服養如已生時許氏納采有日瑾以書告緩其期將輟吾女之奩筐嫁焉許氏亦惻然復曰君侯獨能抑已女而拔人孤女予有季子願以為婦卒與俱歸久之瑾夢綠衣丈夫造庭謝曰不圖賤息辱賜於君今得請於帝奉十任官祿後果歷十郡太守終江淮發運使瑾之裔有仕籍於朝者常十餘人世為冠族云

周述太平興國二年為江州刺史施政安民崇儒重

九江府志卷之七

十二

道上言廬山白鹿洞學徒數百乞賜九經使肄習之詔從其請俾國監給以印本驛送至洞

柳寵新建人咸平間舉進士知江州德化縣清心勁節寬猛攸宜後官至九卿思廬山秀麗卒歸隱焉潘興嗣字延之新建人與王安石曾鞏友善為德化縣尉時許域為江州刺史興嗣往見域踞坐不為禮興嗣徑歸徜徉山水間自號清逸居士公卿交章薦數十上熙寧初以瑞州推官召不赴士大夫

高其風下車皆造其門未嘗不語移日也嘗崇尚
濂溪之學因作銘以表其墓焉

羅彧景德中扈駕親征至澶淵與宰相叅議軍務上
遣彧使虜賜以錦衣金帶及錦旗綉八字云明時
折桂衣錦還鄉領本貫江州刺史

呂誨字獻可仁宗朝為殿中侍御史論樞副陳升之
章十八上遂罷知江州材識裕如所施有善政民
多戴之

九江府志卷之七

十三

羅彥輔字經世當塗人登嘉祐四年劉暉榜進士調
南城尉以擒盜賞移江州令其去南城有袖金而
贖于路者謝曰荷汝知我貧然金非所願也固却
之贖者嘆愧而去用薦改著作佐郎知湖口縣僚
吏有告彥輔私受酒息於郡者郡守劉述即以付
吏或曰是事毫末何不兩置之述曰羅湖口廉吏
也不窮見其實則使終自受誣矣果得其誣而反
坐之以父憂去官服除知溧陽再知尉氏縣輟俸

修飭夫子廟後遷少府監簿復以長論不合主官
摭以簿書事中傷之謫江州酒稅或強使求直彥
輔曰九江去家近奉親便復何求哉丁母憂服除
判和州又任池州尤多政蹟進秩正郎致仕年七
十有四卒于家

劉述神宗朝侍御史因劉琦等論王安石貶官述謂
朝廷不當劾言事官貶知江州沉靜有守

石振字興宗紹聖間為彭澤尉建稽古亭於鳳凰山

九江府志卷之七

十四

之岩携三子讀書於其下黃庭堅嘉其好學書讀
書岩三字識於石壁

葉永齡字龜年南康星子人由進士紹聖中任彭澤
縣簿善於為政勸農興學民甚懷之

岳飛字鵬舉相州湯陰人高宗時討曹成平江淮陞
為江南制置使因鎮江州行軍紀律甚嚴士卒托
宿市廛黎明為主人汛掃門宇洗滌釜盎而去且
又受降衆不妄戮一人人感其德繪像祠之至今

江州猶然

趙仕隆建炎中為江州鈐轄李成圍城誓以死守城陷成義之欲用為安撫使仕隆罵不絕口遂遇害韓彥直江西轉運兼權知江州時朝廷還岳飛家貲產多在九江歲久業數易主吏緣為姦彥直搜剔隱匿盡還岳氏時人多服其篤義

朱勝非紹興初充江西安撫使兼知江州有政聲苗劉之變勝非保護之功居多當時朝議亦與之

九江府志卷之七

十五

葉義問字審言紹興中通判江州豫章守張宗元忤秦檜或中以飛語事下漕臣張常先訊之時宗元過九江常先檄義問拘其舟義問投檄曰吾寧得罪不為不祥

趙崇憲字履常汝愚長子嘗從朱熹學知江州郡民歲苦和糴崇憲䟽於朝求蠲之民負茶引錢新舊累至十七萬緡崇憲亟請以新券一償舊券二受賜者千餘家刻石以紀其事又修陂塘以廣灌溉

九數千所

劉穎字公實江西運使判江州以德化縣稅太重逃者多守乞蠲稅不報穎以見重之稅均於荒萊民願耕者第減之而逃民盡復

唐立方字文若蜀人乾道間守江州有善政王十朋有詩贈之嘗為中書舍人年六十有八卒於官

洪均偲鄱陽人嘉泰初為瑞昌令治政有方首明教化不顯事簿書之末士感其德民懷其惠

九江府志卷之七

十六

董槐沿江制置使兼知江州下教曰吾蒞州而吏猶盜不自悔吾且誅之吏乃震恐願自新槐因除民患凡政有宜以利民者惟恐不盡施焉

吳淵字道父江西安撫使兼知江州湖南洞寇蔓入江右破數縣袁洪大震淵命將調兵生擒其渠魁亂遂平

汪立信知江州充沿江制置副使節制軍馬提舉兵甲有政蹟陞江西安撫使

陳埏知江州主管江西安撫司事有善政軍民愛戴樂於薦士幕客甚多

余崇龜字景望興國人開禧中守江州崇新學校濬築城隍躬行阡陌與百姓同勞苦政聲著聞官至兵部侍郎馮扞字秉義南康都昌人由進士寶慶間任彭澤縣令性資質實豈弟慈祥吏民率服未幾遂引退

魏了翁字華父理宗時以同簽書樞密院事督視江淮軍馬開幕府江州申徹將帥調遣援師國家倚以爲重

九江府志卷之七

十七

李若谷河北人高宗時罷叅政或曰胡不效楊仲原之泣若谷笑曰即捶死淚亦不出秦檜聞之大怒謫居江州趙昂發字漢卿昌州昌元人由進士爲彭澤令政尚寬平以忠孝節義勵俗奸暴爲民患者必痛懲之嘗與邑人高竹澗講明性理之學爲士類倡後陞池州通判元兵陷城不屈而死追贈忠毅侯

元曹靖國大德間任彭澤尹爲政簡而廉修譙樓新縣廨夷官道飭水驛建萬里江天亭復淵明祠葺城

隍廟士民感悅立惠愛亭以思之

和裕字仲寬廣平人大德間以孝廉舉任彭澤縣尉
追石振遺事建六角亭於讀書岩前教子姓讀書
其中至今覩者猶景慕云

焦從善字良輔號東澗武城人大德間任彭澤縣尉
移親就養克殫厥孝暇則修舉廢墜振作斯民當
時稱為良吏

馮克敏臨清人延祐間為彭澤簿能修舉廢墜景行

九江府志卷之七

十八

先哲嘗刊狄梁公陶靖節碑及鑄小孤鐵柱

王國輔魯人至正間為彭澤尹初至值水旱相仍民
以歉告公憂民未三四日髭鬚皤然恐民至於莩
亡遂抗疏乞免民租詔許之

劉恒字安禮棗強人至正初為江州總管先以監察
御史敷歷有聲選守是邦增修學校德洽信孚風
淳訟簡年累登郡邑大治有古循吏之風

李黼字子威汝寧人泰定丁卯狀元至正庚寅為江

州總管明年紅巾寇逼淮西黼以九江為豫章藩
屏不可不早為計乃諭民曰為臣死忠為子死孝
黼之分也聞者悚然既而賊陷蘄黃州行省平章
皆遜去公亟發廩賑民收召士卒以待行省知其
忠誠授本省叅知政事行江州南康軍民都總管
後寇至城下黼立城上身當矢石勢不能敵城遂
陷公猶執鐵搥指揮左右迎戰衆潰公被執脅以
刃不屈罵不絕聲遂與姪秉昭同遇害追封隴西

九江府志卷之七

十九

郡公謚文忠賜廟額曰崇烈丁鶴年詩云叔姪並
歸忠義傳江山不盡古今愁

張士熙至正間湖口尹為政有方民懷其惠及去老
稚攀號車莫能行邑人勒石頌之

陳元愷字時舉鳳翔人至正間守江州尊學校以表
章儒先復狄梁公廟崇周濂溪墓葺魏了翁廬人
稱損齋先生士多宗之

陶琥璿字均政號南窓彭澤縣建安鄉人經明行脩

孝弟之實著聞閭里大德問應彭澤縣尉曹靖國
之薦授彭澤縣簿終於官

國朝孔復字士亨山東博興人永樂初以御史出知九
江府宅心仁厚廉公有威案牘清而吏弊殄田野
闢而民用饒至今人猶頌之

求琰字信圭浙江新昌人宣德中授九江府通判蒞
政務崇寬厚時推刑者多刻琰曰立法雖嚴行之
貴恕民感之不訟值 勅建天池寺督役者多擾
民訴于琰遂躬督之赴工者忻然忘勞歲歉勸富
室出粟賑之民賴全活

九江府志卷之七

二十

謝昶湖廣黃崗人正統間進士天順三年知九江府
勤於吏事纖細靡遺憫民之力心在窮廬其聽訟
惟以人情處分而不專於法律當時多以循良目
之

安永陝西邯鄲人天順中任九江府同知廉慎勤勞
不尚刑威而人自服修甘棠隄以固形勝構思賢

橋以便往來歷任六載卒于官民感慕之

蘇致中字敬之四川巴縣人由舉人成化間以郎中陞知本府才識越人以勤蒞事公家典則多其創制恤民隱不遐遺五縣迄今仰之有書畫多傳於世

童潮浙江慈谿人弘治初任九江知府公勤仁恕濟以文學修蕪葺敝民不知勞今之父老猶相傳其遺愛焉

九江府志卷之七

二十一

周津字文濟浙江慈谿人由進士先任御史陞知九江府有治劇理煩之才救民瘼如切已躬居任一年徭役均詞訟簡鹽法通若買補軍伍弊政盡行釐革尋改瑞州府去之日民欲挽留訴于朝者至再

劉璣字用齊陝西咸寧人弘治中任九江府知府馴民而不擾崇祀而不瀆專以孝弟立教有古君子之風官至戶部尚書

高友璣字肅政浙江樂清人由進士弘治間刑部郎中陞九江府知府持身謙謹剖事嚴明非國計銖錢不歛非急務隻丁不差每飭戒僚衆通惠商賈而闐闐之貨經年絕無官衙之擾其他善政大率類此

周廷徵字公賢湖廣麻城人由舉人授安福教諭以才行擢御史正德六年陞九江兵備副使蒞政嚴明推誠馭下時當首任而綜理周密百度皆舉兼

九江府志卷之七

二十二

文學優贍樂於課士後以流賊犯境奮志勦捕發疽而卒

李從正字時中山西蔚州人由舉人歷任禮部郎中正德間陞九江知府練達有為不沮權勢興革區畫悉當人心時北賊橫江從正多方捍禦卒不敢犯政暇仍與生儒辯難經義商確時務後以老乞歸郡人攀留不得遂脫靴以寓不忘之意

張茂蘭字德馨山東章丘人乙丑進士正德九年以

戶部主事權舟九江忠藎自誓民隱在念商稅較他徵者省減十之五雖貲寶滿前視若土苴人謂立關以來自然之清無踰於茂蘭者又性坦夷樂善忘勢溫然之德如玉可愛半載力以疾辭去

王敞字元量直隸泰州人正德間由舉人授本府同知諳練世故政尚寬平先是清戎籍者多勒里胥買補民苦之敞惟以見戶查報不尚刻苛而民亦無隱情又嘗握印篆權舟稅權知廣信府事盡心

九江府志卷之七

二十二

厥職廉潔自修而所在治聲足稱云

戴經字孟常浙江嘉興人由舉人正德間任本府推官居官執法清苦自持尤工於詩賦著有潯陽餘稿歷任六載獨處官署不以家累當道嘉其賢能屢致獎勸陞山東泰安州知州

余世盛字昌期廣東東莞人由舉人先任國子學錄正德間陞本府推官外貌若愚內蘊衡鑑聽斷惟公民自不冤嘗權知德化德安湖口三邑每以愛

民爲念秋毫無犯當道屢獎陞廣西思明府同知
杜璉臨潁人由監生嘉靖元年授九江府通判卒於
官民思遺愛請於東知府立祠祀之郡人廖紀記
曰自杜公蒞任先年積弊一洗之如里胥包收官
司分例解戶加徵囹圄苛刻輿皂需索吏書誅求
杳無聞焉是可以爲將來勸也祠在能仁寺後山之巔
劉仁欽瑞昌人元末避亂居板林因以爲號陳友諒
據江州携妻子以逃及友諒敗群雄紛起衆推立

九江府志卷之七

二十四

爲長仁欽諭曰願衆無暴掠擁兵自守可也洪武
六年事 聞授瑞昌知縣

黃太安湖廣蘄州人洪武元年知彭澤縣會兵燹後
艱關跋涉身勞民事惟以廉勤爲政百度更新
傅道字士行錢塘人洪武中任德化縣丞清介自持
携二童隨任時僞漢初平民亂野荒道力輯和遂
獲成效卒于官貧不能歸乃葬城東欽天山麓
鄭通五河人洪武中知德安縣勸課愛民政平訟理

詣學課諸生經史興賢育材爲首務與俗吏殊焉
鄭思賢北京東安縣人洪武間爲德安縣知縣仁以
育民廉以律已秩滿邑民上疏留之復任九載政
治如初卒於官遂葬縣山之麓

曹麟四川人洪武中知德安縣豁達守禮教民樹藝
政不煩而俗自化

鄧周字文郁連州人由監生授刑部照磨陞彭澤令
邑多虎患周曰其咎在令乃禱城隍虎遂引去又

九江府志卷之七

二十五

邑多火患曰此覆茅累也何不治陶冶以易之民
樂從其言不二三年比屋皆瓦而火厄遂息

王銘建安人永樂中舉孝廉知德安縣豈弟樂易民
不忍欺先邑有虎患銘禱城隍一夕雷擊虎于縣
西箬山巔重建文廟聿新教化士民感德焉

貢徵直隸井陘人永樂中任德安縣丞賦性明敏剛
毅有爲未及三載創建儒學明倫堂尚德崇文二
齋及輿梁橋其克知先務士論重之

潘貴福建候官人永樂中任德安縣典史邑俗不習于績歲辦夏稅苧布徃徃困于辦納貴請于朝改輸綿布至今便之

杜縉廣東南海人洪熙間以湖廣叅議左遷德安知縣持已廉而不矯處事直而攸當士民愛之

林道安福建甌寧人洪熙間由給事中左遷德安縣丞寬厚仁愛無暴無苛贊協長令民乃奠綏

馬驄字馴良廣西臨桂人正統間知德化縣惠愛百

九江府志卷之七

二十六

姓廉慎不私嘗修甘棠隄作煙水亭及新濂溪祠皆不費于民後陞工部主事未任卒于官葬廬山之麓

劉仁宅字廣居湖廣華容人正統間知瑞昌縣廉勤有為下車首陳三䟽蠲赤湖虛課二萬緡免舊欠蘆柴十餘萬完逋稅數千石時九江邏卒索路於深山與村民格鬪仁宅撫諭之卒遂散去後陞御史子忠宣公大夏適生於是邑人以為仁政之報

云

楊安穎縣人天順末知德化縣正直公廉常種蔬自給一毫不取於民

常元直隸山陽人成化初知彭澤縣嘗建議移龍城驛於小孤山遷峯山巡檢司於臙脂港減編馬船首戶分割鄱陽地界四事議雖未允而達者是之李榮福建南平人成化間知德安縣為政清約敬神愛民崇重文教克盡提調之職故邑俗轉移榮與

九江府志卷之七

二十七

有力焉

徐俊浙江武義縣人由監生弘治初以寧國府經歷陞知彭澤為政有方吏民率服甫二載而歸民以興學校廣街衢設津渡修古祠備災荒弭盜賊均賦稅簡詞訟八事誦之皆實蹟而非溢美云

朱廷宗直隸崇明縣人由監生弘治間知瑞昌宅心公直律已清謹去任之後民立碑思之

朱麟福建閩縣人由舉人弘治間知德化縣政務寬

平人民安妥捕盜救荒籌策盡善九年考蹟陞杭
州通判

王春浙江嘉定人由舉人弘治中任德安縣知縣學
識充贍廉能謹恪修衆務而不蠹于財靖百里而
無警于寇去之日攀轅者遮道

汪明直隸武義縣人弘治間任湖口縣知縣才幹有
為百度振舉邑之規制殊昔多其遺蹟

黃源大福建閩縣人由舉人正德間任瑞昌知縣端

九江府志卷之七

二十八

謹沉毅有節介興利祛弊政績丕著去任後教諭
魏暹采其善政可法者題曰遺德十蹟

陸郁陝西西安人由監生正德間任湖口知縣廉靜
寡慾嚴於自治在任八年每食蔬素時人以陸青
菜號之當道屢加獎勵陞鹽運司提舉

朱諒淮安府山陽縣人洪武中為德安教諭富於文
學而施教不倦秩滿陞翰林春坊

張慶會江西新喻縣人洪武中由明經舉為德安縣

學訓導充養優邃勤於教人以疾卒于官復舉其子宗悅為前職克紹先業啓迪後生師友恩義能兩盡之亦卒于官

朱經福建南平縣人永樂中任德安縣學訓導德行文章俱有可觀又精於字學而真草篆隸皆有古意士類多賴其甄陶云

黃鳳福建漳浦縣人永樂中任德安教諭容儀端謹經義精明雖飲食居起亦寓教人之意諸生中有

九江府志卷之七

二十九

賢敏者禮貌之狂悖者威斥之由是士多砥礪九年陞教授

陳賢福建莆田人永樂初任湖口教諭樂教不倦有興學成俗保民恤物之功士評歸之立祠學宮布政彭韶為之記

林純字居粹浙江黃巖人永樂中任湖口訓導為人謙飭士習化而正僚友化而和去後士子懷仰設木主祀之少司寇林公鶚乃其子也

殷暉直隸吳縣人永樂間由進士以編修左遷彭澤
教諭行檢足以範士文章足以華國當時科目得
人之盛實其誨導之功也

向文敏字懋學湖廣沅州人宣德初任湖口訓導清
脩自好士類賴其造就者多卒于官遂與陳賢林
純合祀號為三先生云

曾貢吉安府吉水人正統間以經明行修薦為德安
訓導遠承家學卓有儀刑九載之內未嘗一日輟

九江府志卷之七

三十

講席當時若徐富曾輝陳奎劉英皆其陶鑄云

常纓浙江嘉興人天順間任德安訓導學行俱優訓
生徒懇懇無倦訂頑擊蒙其功良溥秩滿陞國子
學錄

何綸湖廣石首人由舉人天順中任彭澤教諭學問
純實剪黜浮薄之習屢典文衡惟秉至公秩滿去
士林懷仰不已

陳旒直隸崑山人成化間任瑞昌縣教諭文翰足佳

啓人有則於持已繩墨不踰毫忽深得師儒之體云

曹廣直隸巢縣人成化間任瑞昌訓導師模端楷訓誨嚴明一時人材多其成就

邵清應天江寧縣人由舉人弘治初任德化教諭清白堅貞可質神明挽士風之陋整學政之頽時見素林公俊二泉邵公寶力薦于朝擢監察御史

張輅廣東博羅人由舉人弘治間任府學教授持身

九江府志卷之七

三十一

正大存心端謹登堂課士涉寒暑而不渝貧而力學者周之俾有專志秩滿去士至今稱之不衰

王相福建晉江人弘治間任瑞昌縣教諭肅威儀寡言笑凜然風采人不敢犯鼓舞之下士習為一新

羅鏊四川永川人由舉人正德初任府學訓導博學能文優於講貫尤敦尚道誼而於勢利之談絕形諸口未逾年而卒于官

胡頤廣東東莞人任彭澤訓導邃於易學尤工於詩
教人以身先之雖怒色不形而士皆欽服

高通福建莆田人由舉人正德中任德安教諭居官
勤慎惟以分誼自安時督學者薦其學術純雅教
條詳明居五載陞直隸瀋山縣知縣

史智廣東揭陽人正德間任府學教授宅心中正樂
於教人推已祿以給課士之需置義田以應公出
之費居官九年不携妻子人尤難之

章琥字德器直隸石埭人正德間任德安教諭清慎
自持文學充博訓諸生必先義利之辯嘗捐已俸
修祭器構號舍當道重之歷五載薦陞國子學錄